



## 沉底

十歲彼年，拄著第一擺石油危機，阿爸原本佇漁會的頭路嘛因為景氣傷稔煞無去。幾分仔瘦田欲戔養阮六個囡仔是誠食力，只好共車頭邊仔彼塊園開墾落去種菜。

國中的時，逐日透早，天拄拍殍仔光，阮就愛去園裡鬥薈菜，通好予阿爸會赴佇六點的時載去菜市仔賣。若欲恰去菜市仔喝賣青菜比起來，我較甘願跔跔園裡薈菜，上無袂拄著阮班的同學，嘛袂去予阮學校的老師搪著。

熱人的時天較早光，囡仔人極加是睏無飽眠爾。若到寒人，冷風 sannh-sannh 叫，薄薄的 jiàn-bah 較穿嘛穿袂燒。菜若薈好，著愛共牢佇根的塗洗予清氣，這個時陣毋才是艱苦。水池仔的水因為寒流到位已經凍規暝矣，手若沐著水就親像去予冰焐著。有當時仔菜洗好，手嘛強欲麻去矣。看小妹的指頭仔必甲流血流滴，阿爸就叫阿母免遐儉，若欲洗菜，對 mooh-tah 抽一寡仔地下水來透，水較袂遐凍。

真正的呢，自從阿母抽 mòo-tà 的水予阮洗菜了後，阮的手袂閣再因為霜冷的水來必開，沐著水嘛較袂必必掣。毋過予我想無的是：「是按怎拄抽出來的水煞會略略仔燒烙？」我問阿母：「全款是水，是按怎拄抽出來的水會燒烙燒烙？佇水池仔的就遐爾冷？」阿母講：「煞毋知影地下水沉佇塗跤底，無受著天氣的影響，外口寒咱就感覺伊較燒；外口熱咱就感覺伊較冷。啊水池仔的水，會綴外口的環境變化，寒天感覺會較冷，熱天就較燒烙。」

阿母無讀冊，毋過伊的話有真深的人生哲理。予我知影，原來變化的毋是水，是「環境」，環境無全會影響咱對溫度的感受。

人講：「飽穗的稻仔頭犁犁。」若按呢，水毋就親像人？有底蒂的人就若親像沉佇塗跤底的水，予人親近的時嘛感覺真溫暖。干焦彼種半桶師仔才會受著環境影響，有淡薄仔成就就嚟嚟越，啊若矢志就規氣放予倒。

我甘願做一个「沉底」的人，佇寒人予人感覺溫暖，佇熱人予人感覺清涼。

作者：林美麗

### ☆詞彙學習☆

【食力】tsiàh-làt：用力、費力。

【拍殍仔光】pah-phú-á-kng：黎明。

【薈】khau：從土中拔除花草類的植物。

【跔】khû：蹲。

【jiàn-bah】：夾克。

【焐】ù：將兩個溫度不同的東西靠近，使溫度上升或下降。

【mòo-tà】：馬達。

【必必掣】phih-phih-tshuah：因恐懼而身體發抖。

【燒烙】sio-lō：溫暖、暖和。。

【底蒂】té-tì/tué-tì：根蒂。根本，基礎。

【半桶師仔】puànn-tháng-sai-á：學藝未精的技術人員或學徒。

【嚟嚟越】tshiák-tshiák-tiô：雀躍。比喻心中非常歡喜。